

Sunday, June 28, 2026

Time - 2:30pm - 2:35pm

AKASHVANI AIZAWL
REGIONAL NEWS UNIT

REGIONAL NEWS BULLETIN
(MIDDAY)



SEWERAGE

PHE Minister Prof Lalnilawma'n Aizawl khawpui chep tak kara septic tank thli luanrualna tur soak pit hman a nih chuan kawng tam takah khawpui hmasawna a thlen dawn a ti.

Minister hian AMRUT 2.0 hnuaia PHE project kalpui mek “Sewerage & Septage Treatment Works for Zone-7, Aizawl City Small Bore Sewer, Tuikual Lui” a tlawh naah he thu hi sawiin, Aizawl khawpui chep takah septic tank thli luanralna tur soak pit nei tha lo leh nei mumal lo an tam hle a ti a, Septic tank tui hi a rimchhiat piah lamah natna hrik tam tak pai a nih vangin him taka deh ral a tul thu a sawi bawk. Pipe phum tur hi kilometre 31 leh metre 41 a thui a ni a, tun dinhmunah km 8 leh metre 6 a thui phum tawh a ni a. Pipe phum hna hi zan dar 9:00 atanga a tuk zing dar 5:00 thleng thawh thin a ni. He project hian Tuikual Lui a thli luang veng hrang hrang 10 chu- Chawnpui, Tuikual North, Tuikual South, Dinthar, Dawrpui Vengthar, Vaivakawn bakah Kanan, Khatla, Dawrpui leh Zarkawt veng hmun thenkhat atangin a la khawm dawn ani.

He pipe hmang hian septic tank atanga thli lakkhawm hi sorkar ram MINECO ah a tihthianglimna hmun Sewage Treatment Plant (STP) a sawngbawl tur a ni a. Heta thli tihfim tawh hnu hi leiṭha leh thildangah ṭangkai taka hman leh theih tur a ni.

He STP hian nikhatah ek thli litre maktaduai 3 leh nuai 5 a tithianglim thei dawn a. Septic tank khat tawh, ek paihna tur mumal a la awm loh avangin he project hnuaiah vek dian ek paihna tur Faecal Sludge Treatment Plant (FSTP) pawh STP hmunah hian a awm nghal dawn bawk a ni.



GST COLLECTION

Ramchhung state hrang hrang Goods and Services Tax (GST) dinhmun tarlanah Mizoram GST chu nikum 2025 May thla chhunga khawn aiin kumin May thla-ah za zela 12 in a pung.

Ministry of Finance tarlan danin July 2017 atanga GST hman anih hnuah rampum huapa GST khawn chu a pun belh zel a, nikum 2025 May thlaa GST nena khaikhinin a punna hi cheng vbch 6012 niin za zela 3.2 a ni a, amaherawhchu India ramin kumin 2026 May thla chhunga GST chhiah a khawn zat cheng vbch nuai 1 sing 9 sang 4,184 aiin April thlaa khawn cheng vaibelchhe nuai 2 sing 4 sang 2,702 chu a tam zawk a ni.



SA YOUTH

Vawiin hi Salvation Army, India Eastern Territory ah SAY Sunday a nih angin, IET hnuaia Salvation thalaite leh Corps ten urhsun takin he hun hi an hman.

SAY Sunday pual hian nimin Inrinni khan Corps hrang hrang te chu Mizoram chhunga Salvation Army Institution hrang hrang bakah Cancer Hospital leh miharsate hnenah an luangchhuak tawh a. Vawiin lamah SAY sunday pual hian corps hrang hrangah Speaker te sawmin, Crusade buatsaih a ni a, corps thenkhat chuan thusawi turin headquarters-a an hotute an sawm a. Chawhnu ah Mual inkhawm leh Chawnghei Tawngtai te huaihawt tura ruahman a ni a. Zan lamah Praise and Worship leh sermon te nen inkhawm urhsum tak buatsaih zui a ni ang.

Kumin hian Territorial SAY-in ‘Bring Them In 2.0’ kalpui tura Corps tin a ngen angin kumtir atangin Membership drive te kalpui a ni a, khawlai rawngbawlina hun hman thin a nih bakah, mamawhtute hnenah luanchhuahna buatsaih a ni bawk. SAY te inngahna Bible chang chu Thufingte 24:11 a ni.



MZP

Mizo Zirlai Pawl (MZP)-in Mizoram-a Special Intensive Revision (SIR) tih mekah Chakma khua bika thil fel lo awm nia lang te chu draft electoral roll zawhfel huna ennawn tha leh tura ngenna Joint Chief Electoral Officer (CEO) hnenah an thehlut.

Akashvani Aizawl News zawhna chhangin, MZP General Secretary C. Lalhmingsanga chuan tun thla June ni 24 khan Mizoram Joint Chief Electoral Officer hnenah Mizorama SIR kalpui mek chu dik leh felfai taka kalpui a nih

theihna turin, kum 2005 E-Roll a khaw awm lo, a hnu a khaw 97 awm thar chungchang bakah India leh Bangladesh khua-leh-tui nihna nei kawp mi pakhat an hmuhchhuah bakah E-Roll a House number nei lo an hmuhchhuah chungchang te thlenin, draft electoral roll zawhfel a nih huna ennawn tha leh turin ngenna an thehlut tih a sawi a ni.

